

**Inatsisartut Naalakkersuisullu pillugit Inatsisartut inatsisissaattut siunnersuut****Akissuteqaat**

(Naalakkersuisut Siulittaasuat)

**Aappassaaneerinnineq**

Aallarniutigalugu inatsisit atortinneqarnerannut ataatsimiititaliap peqqissaartumik isumaliutissiissutaanut Naalakkersuisut qujassuteqassapput peqatigisaanillu Naalakkersuisunit assut naammagisimaarutigalugu paasineqarluni siunnersuutip akuersissutigineqarnissaa ataatsimiititaliap isumaqatigiittup inassutigigaa.

Siunnersuutip tusarniutigineqarsimanninnera ataatsimiititaliamit isornartorsiorneqarpoq, Naalakkersuisullu ataatsimiititaliap isumaa tusaatissatut tigullugu. Ilisimaneqartutut siunnersuut sivisuumik ingerlanneqarsimavoq Inatsisartunilu arlaleriarluni oqallisigineqartarsimalluni. Siunnersuut innuttaasunut tunngasunik malittarisassaliunngimmat akerlianilli Inatsisartut Naalakkersuisullu akornanni pissutsinik taakkulu iluanni pissutsinik teknikikkut annertuutigut malittarisassaqaqtitsimmat Naalakkersuisunit nalileneqarsimavoq tusarniarfigisassanik naleqquttunik toqqaanissaq ajornakusoorsimasoq.

Ataatsimiittarnerit allanngortinnerisa akuerineqarnissaanut siunnersuutikkut Inatsisartut periarfissinneqarput, Naalakkersuisullu soorunami apeqqut taanna Inatsisartut siulittaasoqarfiannut isumagisassanngortissavaat, Naalakkersuisulli naammagisimaarlugu paasivaat inatsisartut inatsisaannut atuuttumut naleqqiullugu allannguut naleqquttutut ataatsimiititaliamit isigineqartoq.

Atuuffinnik allanik suliaqarnerit akissarsiaqartitsinermut inatsimmiit Inatsisartut Naalakkersuisullu pillugit Inatsisartut inatsisaannut nuunneqarnissaannik siunnersuutigineqartut pillugit apeqqut eqarsaatigalugu periutsip allanngortinneqarnissaa siunnersuummi eqqarsaatigineqanngilaq. Aalajangersakkamulli atuuttumut nassuiaatit naatsuararsuupput aalajangersakkamullu nassuiaateqaqqittoqarnissaa kissaatigineqartoq nalileneqarsimalluni. Erseqqissumilli aallaavigineqartoq tassaavoq inuk ataaseq Inatsisartut siulittaasuattut, Naalakkersuisut siulittaasuattut imaluunnit Naalakkersuisunut ilaasortatut suliaqarnermi saniatigut allamik suliffeqarsinnaanngitsoq, tamanna Qinigaanerup Misilinneqarnissaanut Ataatsimiititaliamit akuerineqarsimanngippat. Atuuffinnik inuussutissarsiutinilluunniit allanik isumagisassaqaarnissamut piumasaaqartoqartassaaq aamma Inatsisartut aamma Naalakkersuisut siulittaasuattut imaluunnit Naalakkersuisunut ilaasortatut inuit suliaqartut pisortani suliaqarnerminni saniatigut atuuffinnik inuussutissarsiutinilluunniit allanik ingerlataqarnerup malitsigisaanik soqutigisatigut aporaaffiusoqannginnissaanut atatillugu isigineqassaaq. Naalakkersuisulli ataatsimiititaliap oqaaseqaatai tusaatissatut tiguaat siunnersuutillu pingajussaaneerneqarnerani taaguutit atuuffiup aamma inuussutissarsiutip atorneqarneri pillugit ataatsimiititaliap isumaa eqqarsaatigalugu allannguutissamik siunnersuuteqassallutik.

Naalakkersuisut taamaalillutik siunnersuutip pingajussaaneerneqartussanngortinnissaa kaammattuutigissavaat.

10. november 2010

UKA2010/24